



Na osnovu člana 13. stav 1. Zakona o političkim organizacijama („Službeni list SRBiH“, broj: 27/1991) politička organizacija „Republikanci Bosne i Hercegovine“ na osnivačkoj skupštini održanoj 20.02.2026. godine u Sarajevu, jednoglasno donosi:

## **S T A T U T**

### **POLITIČKE ORGANIZACIJE „REPUBLIKANCI BOSNE I HERCEGOVINE“**

#### **I OSNOVNE ODREDBE**

##### **Član 1.**

Politička organizacija „Republikanci Bosne i Hercegovine“, skraćeni naziv „Republikanci BiH“, (u daljem tekstu „politička organizacija“) je organizacija u kojoj se građani slobodno i dobrovoljno organizuju radi ispoljavanja političkih aktivnosti i ostvarivanja političkih ciljeva.

##### **Član 2.**

Politička organizacija se organizuje i djeluje na teritorijalnom principu i prostoru Bosne i Hercegovine. Sjedište je u Sarajevu na adresi: Branilaca Sarajeva br.20

##### **Član 3.**

Rad političke organizacije je javan, osim u slučajevima zaštite ličnih podataka članova i njenih organa, dokumenata snadbjevenih stepenom tajnosti u skladu sa zakonom, osim „Interno“, te zaštite moralnih normi članova, o čemu odluku donose organi političke organizacije koji mogu isključiti javnost iz djelokruga njihovog rada u skladu sa Zakonom.

##### **Član 4.**

Politička organizacija ima svojstvo pravnog lica, koje stiče upisom u sudski registar u skladu sa Zakonom.

### **Član 5.**

Politička organizacija se ne može učlaniti u međunarodnu organizaciju čija djelatnost nije u skladu sa članom 4. stav 1. Zakona o političkim organizacijama.

### **Član 6.**

Politička organizacija se može organizovati u saveze i druge oblike udruživanja političkih organizacija, o čemu odluku donosi Skupština u skladu sa Zakonom i ovim Statutom.

## **II CILJEVI I NAČIN NJIHOVOG OSTVARIVANJA**

### **Član 7.**

Rad političke organizacije se temelji na sljedećim ciljevima:

1. Zaštita ljudskih prava i temeljnih sloboda definisanih Ustavom Bosne i Hercegovine;
2. Dostizanje ciljeva održivog razvoja i izgradnje svih kapaciteta međunarodno priznate i cjelovite države Bosne i Hercegovine;
3. Ubrzanje Euroatlantskih integracija države i izgradnja prosperitetnog društva utemeljenog na sistemu kvalitete;
4. Jačanje vladavine prava sa nultom stopom tolerancije na korupciju;
5. Efikasniji sigurnosno-odbrambeni sistem,
6. Unaprijeđenje neovisnih i optimiziranih institucija zakonodavne, izvršne i sudske vlasti kao javnih servisa svih građana;
7. Poticanja solidarnosti i društvene odgovornosti nositelja svih javnih funkcija;
8. Ekonomsko socijalna stabilnost države utemeljena na pametnoj specijalizaciji i prioritarnom razvoju inovacija i održivih ekosistema;
9. Kontinuiranoj podršci malim i srednjim preduzećima kao nosiocima održive ekonomije;
10. Razvoja pametnih gradova sa nultom emisijom zagađenja okoliša;

Način ostvarivanja ciljeva iz stava 1. ovog člana temelji se na:

- provedbi pozitivnih zakonskih normi, programskih načela, statuta, vizije i misije političke organizacije,
- učešćem u predizbornim i izbornim aktivnostima za sve nivoe javne uprave,
- učešćem u vlasti ili djelovanjem u opoziciji, kao i kroz druge oblike i načine političkog djelovanja u skladu sa Ustavom i Zakonom.



Vizija političke organizacije: Bosna i Hercegovina punopravna članica EU 2030. godine, kao reformirana, inovativna, moderna i suverena država, u kojoj su zagarantovane ljudske slobode, vladavina prava i jednakost svih njenih građana.

Misija političke organizacije: Odlučno i plansko unaprijeđenje postojećeg sistema, kroz reformske procese zasnovane na znanju, dijalogu, infrastrukturi kvalitete i jačanju javne uprave kao efikasnog servisa svih njenih građana.

### **Član 8.**

Politička organizacija djeluje na principima:

1. Solidarnosti - pomoć za sve obespravljene
2. Društvene odgovornosti - javni interes ispred ličnog
3. Kompetentnosti - znanje je temelj svake funkcije
4. Nepriistrasnosti - jednaka pravila za sve
5. Neovisnosti - sloboda odlučivanja u javnom interesu
6. Pouzdanosti - djela moraju pratiti obećanja

## **III NAZIV, SJEDIŠTE I OBILJEŽJA**

### **Član 9.**

Puni naziv: „Politička organizacija Republikanci Bosne i Hercegovine“

Skraćeni naziv: „Republikanci BiH“

Sjedište je u Sarajevu, ulica Branilaca Sarajeva br.20

Politička organizacija ima svoj znak, zastavu i himnu, koji se bliže uređuju odlukom organa političke organizacije.

### **Član 10.**

Pečat političke organizacije je okruglog oblika sa punim nazivom političke organizacije, sjedištem i znakom u sredini.

Odlukom organa političke organizacije bliže se uređuje način korištenja i čuvanja pečata.

## **IV USLOVI I NAČIN ZA UČLANJENJE I PRESTANAK ČLANSTVA, KAO I PRAVA, OBAVEZE I ODGOVORNOSTI ČLANOVA**

## **Član 11.**

Aktivni član političke organizacije može postati svaki punoljetni državljanin BiH koji ispunji uslove za prijem koji propisuje Skupština i koji nema zabranu političkog djelovanja izrečenu od strane suda ili drugog nadležnog organa u Bosni i Hercegovini, dok ta zabrana traje.

Članom se postaje potpisivanjem pristupnice. Osnivači stranke koji su potpisali izjavu podrške pri osnivanju su ujedno i aktivni članovi političke organizacije.

Aktivni član ima pravo da bira i bude biran u svim organima i tijelima u kojima politička organizacije učestvuje.

Simpatizer može biti i ne državljanin BiH.

## **Član 12.**

Prestanak članstva je dobrovoljan i prestaje na vlastiti zahtjev ili isključenjem.

Isključenje iz redova članstva mora potvrditi Skupštinski Senat.

## **Član 13.**

Svi aktivni članovi imaju svoja prava, obaveze i odgovornosti u skladu sa Statutom i programskim ciljevima političke organizacije.

U svom radu svi aktivni članovi su neovisni i odgovorni organima političke organizacije i/ili licima koje ti organi posebnim aktom imenuju i zaduže za pojedinačne slučajeve i aktivnosti.

Za eventualno kršenje etičkog kodeksa članovi političke organizacije odgovaraju pred Skupštinskim Senatom.

## **V ORGANI I NJIHOVA PRAVA, OBAVEZE I ODGOVORNOSTI**

### **Član 14.**

Političkom organizacijom upravljaju organi:

- Skupština
- Senat
- Predsjednik
- Predsjedništvo
- Generalni sekretar
- Forum mladih

**a) Skupština:**

- Skupštine se sastaje na redovnim sjednicama (najmanje jednom godišnje) i vanrednim sjednicama po potrebi;
- Osnivačka Skupština je sastavljena od od minimalno 50 osnivača. Osnivačkom skupštinom do izbora predsjedavajućeg Skupštine rukovodi najstariji delegat iz redova osnivača.
- Skupštinom predsjedava Predsjedavajući Skupštine, koji se bira javnim glasanjem iz redova članova Skupštine natpolovičnom većinom prisutnih članova;
- Mandat Predsjedavajućeg Skupštine traje 4 godine i može se na Skupštini obnoviti za još jedan mandat u naredne 4 godine;
- Donosi na osnivačkoj skupštini Program djelovanja i Statut;
- Donosi izmjene i dopune Statuta na redovnim i vanrednim sjednicama;
- Bira organe stranke: Skupštinski Senat, Predsjednika političke organizacije, Izvršni odbor i Generalnog sekretara u redovima svojih članova, javnim glasanjem na redovnoj ili vanrednoj sjednici;
- Donosi Poslovnik o radu Skupštine, te njegove izmjene i dopune;
- Vrš i duge poslove u skladu sa Zakonom, ovim Statutom i svojim odlukama;
- Skupština se može održati i online u posebnim slučajevima, što će se bliže urediti Poslovnikom;
- Glasanje na skupštini je u pravilu javno i odluke se donose javnim glasanjem „za“, „protiv“ i „suzdržan“, a rukovodstvo Skupštine može odlučiti da se pojedine odluke mogu donositi i tajnim glasanjem;
- radu Skupštine vodi se zapisnik;
- Izbor dodatnih članova Skupštine će se urediti posebnim aktom;
- Izborna skupština se održava svake 4 godine;

**b) Senat:**

- Predsjedavajući Skupštine predlaže Predsjednika Senata i Senatore iz redova najistaknutijih članova Skupštine na svojoj izornoj sjednici.
- Predsjedavajući Skupštine je ujedno i Predsjednik Senata.
- Minimalni broj Senatora je 3 (tri) i oni trebaju odražavati multikulturalnost Bosne i Hercegovine, a može ih biti i više ako tako Skupština odluči.
- Biraju se javnim glasanjem većinom glasova prisutnih delegata na Skupštini.
- Senat donosi Poslovnik o svom radu i Etički kodeks u skladu sa dobrim praksama i EU standardima, te provodi postupke provjere i disciplinske odgovornosti članova i nositelja javnih funkcija ispred političke organizacije.
- Senat može ovlastiti i vanjska tijela ili stručne pojedince za pružanje neovisnog audita kvalitete rada organizacije.

**c) Predsjednik političke organizacije:**

- Senat predlaže Predsjednika političke organizacije u skladu sa principima političke organizacije;
- Bira se javnim glasanjem većinom od prisutnih delegata Skupštine.
- Predsjednik rukovodi organizacijom u saradnji sa ostalim izabranim tijelima, zastupa organizaciju u zemlji i inostranstvu, promovira ciljeve organizacije i komunicira sa javnošću, te vrši i druge poslove u interesu Stranke i izvršava poslove koje mu povjeri Skupština, Senat i Izvršni odbor.
- Mandat Predsjednika traje 4 godine i može se obnoviti i naredne 4 godine na izbornoj Skupštini.

**d) Predsjedništvo:**

- Predsjednik političke organizacije predlaže članove Predsjedništva političke organizacije, koji pomažu Predsjedniku u obavljanju njegovih dužnosti i drugih aktivnosti od interesa za državu i političku organizaciju;
- Broj članova Predsjedništva je minimalno 3 (tri) a može biti i više u skladu sa razvojnim programom političke organizacije;
- Predsjedništvo na prijedlog Predsjednika političke organizacije, imenuje Skupština većinom glasova prisutnih delegata;
- Predsjednik političke organizacije rukovodi radom Predsjedništva;
- Mandat članova Predsjedništva traje 4 godine i može se na Skupštini obnoviti za još jedan mandat u naredne 4 godine;

**e) Generalni sekretar:**

- Predsjednik političke organizacije predlaže Generalnog sekretara koji vrši administrativno-upravno-pravne poslove i pomaže organima političke organizacije u izvršenju njihovih zadataka.
- Za svoj rad je odgovoran Predsjedniku političke organizacije, koji mu može dodjeljivati i druge poslove i zadatke iz domena svoje nadležnosti prema potrebama.
- Generalni sekretar se bira većinom glasova prisutnih skupštinskih delegata;
- Generalni sekretar može biti biran i iz reda članova Predsjedništva.
- Mandat generalnog sekretara traje 4 godine i može se na Skupštini obnoviti za još jedan mandat u naredne 4 godine;

**f) Forum mladih:**

- Forum mladih okuplja simpatizere i aktivne članove starosti od 18 do 30 godina među kojima bira svoje rukovodstvo,
- Forum mladih pomažu Predsjedništvu političke organizacije u obavljanju programskih ciljeva.

- Skupština iz svog članstva imenuje predstavnika koji će uspostaviti Forum mladih i koordinirati njegov rad
- Mandat predstavnika Foruma mladih traje 4 godine i može se na Skupštini obnoviti za još jedan mandat u naredne 4 godine;

## **VI ZASTUPANJE I PREDSTAVLJANJE**

### **Član 15.**

Političku organizaciju „Republikanci BiH“ zastupa i predstavlja Predsjednik, koji može ovlastiti i druge članove Predsjedništva da u njegovom odsustvu zastupaju političku organizaciju. Ukoliko je Predsjednik političke organizacije trajno onemogućen onda zastupanje i predstavljanje preuzima Predsjedavajući Skupštine do izbora novog rukovodstva, a najviše 90 dana, ili do izborne skupštine.

## **VII NAČIN STICANJA, KORIŠTENJA I RASPOLAGANJA SREDSTVIMA**

### **Član 16.**

Politička organizacija se finansira iz članarina, priloga i budžetskih sredstava, te prihoda od imovine i drugih izvora finansiranja u skladu sa važećim Zakonom o finansiranju političkih stranaka.

Prihodi i rashodi su transparentni i javni. Sredstva se stiču, koriste i raspolazu u skladu sa Zakonom.

## **VII NAČIN OBAVJEŠTAVANJA JAVNOSTI O RADU I STICANJU SREDSTAVA**

### **Član 17.**

Politička organizacija najmanje jednom godišnje obavještava javnost o svom finansiranju putem završnih računovodstvenih izvještaja koje sačinjava neovisna računovodstvena agencija.

Računovodstveni i finansijski izvještaji se mogu podvrći i reviziji finansijskog poslovanja u skladu sa Zakonom o računovodstvu i reviziji, međunarodnim standardima i drugim pozitivnim zakonskim propisima.



## **VIII NAČIN ODLUČIVANJA O UDRUŽIVANJU U SAVEZE I DRUGE OBLIKE UDRUŽIVANJA POLITIČKIH ORGANIZACIJA**

### **Član 18.**

Politička organizacija se može u skladu sa članom 6. ovog statuta udruživati u političke saveze i druge oblike formalnog i neformalnog političkog udruživanja i djelovanja, o čemu odlučuje Skupština na prijedlog Predsjednika i Izvršnog odbora, te najmanje trećine delegata prisutnih na skupštini na kojoj se o tome odlučuje.

Skupština će javnim glasanjem odlučiti o prijedlozima za udruživanje iz stava 1. ovog člana, većinom glasova svih svojih članova.

## **IX NAČIN DONOŠENJA STATUTA**

### **Član 19.**

Statut donosi Skupština na svom izbornom zasjedanju, te izmjene i dopune na redovnim ili vanrednim sjednicama.

Statut je najviši dokument političke organizacije i svi njeni članovi su dužni da ga se pridržavaju.

Ne pridržavanje Statutarnih odredbi povlači težu povredu etičkog kodeksa i može biti razlog za isključenje iz političke organizacije.

## **X NAČIN DONOŠENJA ODLUKE O PRESTANKU RADA STRANKE**

### **Član 20.**

Politička organizacija prestaje s radom odlukom Skupštine, spajanjem ili zabranom rada.

## **XI RASPOLAGANJE IMOVINOM U SLUČAJU PRESTANKA RADA STRANKE**

### **Član 21.**

U slučaju prestanka rada političke organizacije, odlukom Skupštine stranke sva njena imovina bilo pokretna ili nepokretna i novčana sredstva na računima stranke, te sva potraživanja se dijele u humanitarne svrhe prvenstveno socijalno ugroženim

kategorijama stanovništva na području cijele BiH, neposredno ili putem određenih udruženja ili humanitarnih organizacija najkasnije 6 mjeseci od dana prestanka rada organizacije.

Za realizaciju obaveza iz stava 1. ovog člana Skupština će ovlastiti odgovarajuće tijelo koje će imati obavezu da propiše kriterije raspodjele i o tome upozna javnost i nadležne državne organe;

## XII ZAVRŠNE ODREDBE

### Član 22.

Generalni sekretar političke organizacije po ovlaštenju Predsjednika političke organizacije poduzima pravne radnje za registraciju Političke organizacije u sudski registar i centralnu izbornu komisiju.

Stranka počinje sa svojim radom sa danom upisa u sudski registar.

Svi međusobni sporovi će se rješavati internom i eksternom medijacijom i sporazumom, a u slučaju da to nije moguće, nadležan je Sud prema mjestu registracije.

U Sarajevu, dana 25.02.2026.

**Predsjednik Republikanaca BiH**



*[Handwritten signature in blue ink]*